



SEJARAH DESA KUTUL



OLEH :

I NENGAH LATRA



DES A PUCAKSARI
BUSUNGBIU - BULELENG

SEJARAH DESA

Wentene Desa Kutul Tahun 1806

Sedaweg Pemerintah ngeluarang tanah di alas wayahe iriki , kebaos mangkin Desa Kutul. Ring tanggun desane kelod mangkin wenten pembangunan pesanggrahan genah Belanda melila cita. Dening wenten tanah kekeluarang saking Pemerintah iriki raris wenten masyarakat rauh meriki nunas alas puniki sane mewaste sekadi ring sor puniki

Nama Keluarga	Asal Desa
1. Pan Wirya 2. I Wirya 3. Pan Kembar 4. Pan Sandri → <i>MD SANA. MD SITA</i>	Desa Buahan , Tabanan
1. Pan Suma 2. Pan Pasekan <i>KI WIDANA</i> 3. Pan Rai → <i>JAU HAK PARANG OYA</i>	Toh Jiwa , Tanggun Titi , Tabanan
1. Kaki Sami 2. Nurana 3. Nuragia 4. Kaki Pelung 5. I Mastra 6. I Wage 7. Kaki Duri 8. Pam Masti 9. Pan Mangku → <i>GO KEREN, ICZ MOTEUNG AT SUMANTPA</i> 10. Pan Nuriasti	Gelgel
1. Kaki Kaji 2. Nyoman Dangin 3. I Kaja 4. Nyoman Mudiarja → <i>NYOMAN DHARMA.</i>	Gelgel
1. Kaki Kerawi 2. I Kantor 3. I Saba 4. Pan Keramas → <i>RT MAMA AGA MARA.</i>	Gelgel
1. Ketut Loka 2. Wayan Buda → <i>NOTA COTRA KLI. SUKA.</i>	Tangkas , Kori Agung

Jero Mangku Lingsir melinggih ring Banjar Batu Megaang , Pan Putu Penyarikan , Aria Benculuk. Penglingsir – penglisir puniki sami ngelawangun Desane iriki , duaning ring munduke bedanganan , delod desane mangkin medaging pembangunan Pesanggrahan Belanda, dados ring munduke bedauhan kumpul sareng sami Penglingsir – Penglingsire puniki mekarya Pagenahan / Pakubon, Sampun puput sekadi asapunika wawu pacang ngereruat utawi ngabas alase puniki ring soang – soang amongannyane , sakewanten sedurung ngawitin mekarya ngaturang canang rihin ring benengan pelinggih Pura Pucak Luhur sane mangkin , dening derika kapekayun angker antuke ring para Penglingsir – Penglingsire puniki . Sane polih bagian utawi amongan sebaler pateluan , sami ngeredana ngayat Sanghyang Perama Kawi / Bethara nunas ica , nunas mangde rahajeng selamat , sedeng becike derike wenten batu, derike ngenahang canang , sampun puput sekadi asapunika wawu ngawitin mekarya. Tetep pemargine sekadi asapunika , tiap – tiap rahinan ritatkala mekarya.

Sapunika taler sane amongannyane sedelod pateluan pateh pemargine sekadi asapunika ring benengan sane kebaos mangkin Pura Yeh Sakti. Disampune pade galang amonganne soang – soang raris kapaica bibit kopi saking Pemerintah , kocap bibit kopi punika mawit saking Afrika. Sampun taler rihinan kapaicayang ring Desa Munduk , bibit kopi sane kapaica iriki raris Pemerintah ngariayanang conto utawi nekungang bibit kopi punika. Mangkin medabdaban para Penglingsir – Penglingsire pacang membangun Kahyangan Desa. Ring tanggu kelod kaanggen Setra , ring ulun Setra Merajapati , Baler Merajapati ngewangun perumahan utawi Desa , baler Desa ngewangunang Pura Puseh Desa , Dalem. Pura Daleme durung wenten genah , mengingat Penglingsir – Penglingsire kesahan Hindu Dharma saking Majapahit ke Bali nyungsung Betharane saking Solo , kauh saking iriki. Dadosne di munduke tegeh medauh katangiang Pura Daleme kabaos Penelokan doh saking setra mekawinan kewastanan Dalem Sari Pengungangan.

Mewali uningen titiang ritatkala membangun Kahyangan , mungguhin citakan mekarya iriki , yadian merupa kayu iriki ngerereh, nanging semen , bahan sane sios – siosan sane pacang patut tumbas irika ring kota Tabanan numbas. Dening wenten pasar ring kota Buleleng , kota Tabanan , kota Badung. Dening wenten semeton sane saking Buahan dadosne ragane dados Juru Belanja ke Tabanan , memargi nginep – nginep ring perjalanan , sering asapunika pemargine , ritatkala mantuk I Juru Belanja puniki rauh ring sane kebaos Pakangaya mangkin , paling irika kerasa peteng libut gumine , sebilang ngangsehang mejalan tetap mailehan derika jati mula , raris medawegan ngayat Bethara nunas ica , nunas pemargi raris mesriak galang presida ngelanturang pemargi budal , disampune rauh saking desa raris mesadok ring Jero Mangku lingsir indiki sekadi i wawu, raris Jero Mangku ngajak para Penglingsire ke tongose paling tur ngeredana irika sareng sami turmaning sanggup ngariayanang pelinggih irika. Malih walinin tiyang ring Kahyangan Desa di sampun puput

odalan atau karya , raris kodal Ida Bethara sahe sedih metetangisan , duaning medue penjak akedik. Yen umpamayang kadi nultul yeh duur don candunge antuk gamet kanti kedes , kebaos ngametin panjak. Punika mawinan desane puniki kabaos mangda kawastinin Kutul Gading.

Mangkin Pura Pucak Luhur , batune ring genahe sering ngaturang canang punika , katangiang kekaryanang Bebataran , Gedong Sari asiki , linggih Ida Bethara mapesengan Peranda Ngurah Agung , Taksu asiki , pelinggih Jero Nyoman ring sampune puput rauh piyasan raris melaspas nganteg linggih sahe ngaturang odalan atau karya , kodal Ida Bethara. Mungguhin raos Ida Bethara , Ida melinggih ring ulu , irike wenten Pal Gunung. Dening ring genahe mangkin katangiang pelinggih Idane , kayun Ida melinggih iriki sakewanten ritatkala ngaturang aci atau mekarya mendak nuntun dumun ring genahe ring ulu usan punika wawu ngaturang karya. Yan ngaturang aci , mekarya nuju Purnamaning Kapat.

Sesampune puput pailene sekadi asapunika , rauh ke Pura Dalem melaspas Nganteg Linggih sahe karya , mangkin ring Pura Pakang Aya , irika kalinggihang pelinggih jangkep jajaran. Disampune puput ngewangun , melaspas , nganteg linggih sahe mekarya sane kajumput dados Ngemangkunin Pan Suma , Penglingsir saking Nengah Muriasta. Ring Pura Yeh Sakti pateh pailene sekadi inucap ring ajeng. IdaBethara mewasta Bethara Bagus Made.

Wenten malih rauh ngeremponin mekrama desa iriki , nanging megenah ring Banjar Batu Megaang. Mungguhin wastannyane sekadi ring sor puniki.

1. Kaki Darya
2. Kaki Gelok
3. Kaki Rumas
4. Pan Nuriasih
5. Pan Desak
6. Pan Gedong
7. Kaki Gun
8. Pan Kajeng
9. Dadong Mileh

Ring sampene pade ingkup , tur sampun idup pamulane , melajah mawoh kopine raris nangiang Pura Subak , pelinggih Dewa Ayu Mas Ngelepe , dening linggah kari genahe ring Pura Pucak Luhur raris derika katangiang Pura Subake. Dening sami pade ngawe odalan punika ngawinang odalane utawi karyane pendo pisan. Tahun mangkin katurang karya ring Ida Bethara Pucak Luhur , malih atahune katurang ring Pura Subak , tetep sapunika permagine.

Jero Mangku lingsir , ngajak masyarakat numbas gong barungan ane wenten mangkin. Derika ring Desa Pajahan sampun pade cocok aji , ring ajeng Paruman Sekaa Gong irika mabuatan aji duang dasa ringgit selaka. Jero Mangku mejanji malih tigang rahina

ngambil gonge sahe mayah lunas. Kaputusan para Sekaa Gonge nyerahang ring kelian nyane, nerima malih tigang rahina. Disampune tigang rahina merika ke Pajahan Jero Mangku naur penumbas gonge sahe kasarengin masyarakat iriki pacang ngangkut gonge.

Jero Mangku nyerahang jinah penumbas gonge tur kauji ring Kelian Gong , kekelenting – kelentingin yan jangih kelentingane katerima , yan bengkep tan kanggo. Sampun pade puput baose rarisi Jero Mangku sareng I Pengayah pamit tur budal. Ring sampun waktu parum I Sekaa Gong di Pajahan jinah pemelin gonge kamedalan ring ajeng Sekee Gong antuk I Kelian , tahu – tahu jinah punika unteng gedebong. Dening asapunika kausulang meriki nanging tan katerima , dening sampun jinah panumbas gonge sedaweg naur sampun kauji.

Yening kudang taun sampun suwen desane bedauh taler akadik panjak Ida Bethara , nenten nyak endah masyarakat kaboaas antuk pare Penglingsire minab munduke sangkur puniki ngawinang asapunika pade raos penglingsire. Dening sampun pesanggrahan Belandane tan karungan jalan jani gingsiran desane ke munduke bedanganan sawireh munduke ento nganteg ke Jembrana. Kasingsirin Purane yadian desane ke desane mangkin. Jantos puput upakara rauh ngaturang karya nyejer Ida Bethara solas rahina , masyarakat pengayahe megilir makemit ring Pura , kadadosang duang bagian nanging wengine kumpul ring Pura lanang – lanange. Sampun jangkep solas rahine wawu nyineb ngelebar.

Ida Bethara ring Pucak Luhur medue Bajra punika mangde kasuarang tengaran Ida mekadi Bajran Ida Bethara ritatkala karya , taler pangandikan Ida Bethara , Ida medue Serunding duang lembar kabaos Serundinge punika kagadeang ring Ida Bethara sane melinggih ring Pura Pakang Aya ke Desa Pajahan. Naging ring wengine mejanji Ida Bethara nebus benjang jegjeg surya. Benjangne durung jegjeg suryane rauh Ida Bethara Pakang Aya pacang nebus gegadene , dening durung waktu jegjeg surya kari mebebaosan nyantos jegjeg surya. Kadong kelangun bebaose jantos liwat akedik jegjeg suryane , wawu Ida Bethara Pakang Aya ngenikaang nebus Serundinge sane kagadeang. Dening sampun liwat jegjeg surya wawu maosang nebus dadasne gegadene keicalang nenten kawihin nebus. Dening asapunika banget duka Ida Bethara Pucak Luhur ring Ida Bethara Pakang Aya. Mangkin Bethara Pucak Luhur ngenikain Ida Bethara Pakang Aya mangde ke Pajahan ngodalang Serunding duwene. Raris nuju Purnamaning Kapat karya ring Kahyangan Desa taler katuran ring Pucak Luhur kodal Ida Bethara ring Pucak ngenikaang Serunding duwene sane kagadeang sampun kaodalang sampun Jero Mangku Dewa Gunung saking Bongancina katitipin. Baos Ida Bethara Pucak Luhur nganikain Juru Kerek / Juru Sapuh duwene mangde ngerereh ka Bongancina. Raris karereh ke Bongancina sareng patpat , inggih punika I Ketut Siwiadnya sebagai Prebekel , Nengah Latra sebagai Wakil , Nyoman Biru sebagai Kelian Adat, Ketut Pageh Adnyana sebagai Wakil. Nanging tan kaicen ring Jero Mangku duaning baos Ida Jero Mangku Dewa Gunung , dening ragane nuduk Serundinge punika sinah kapaica

ring ragane , sapunika baos Idane . Sesampun raris karya malih , katuran Ida Bethara Pucak Luhur , malih kauningan ring Ida Bethara , malih taler kanikayang nyumunin ngerereh ke Bongancina. Raris karereh antuk I Nengah Latra , Ketut Pageh Adnyana. Pangandikan Jero Mangku Dewa Gunung ngenikain mangde mebaos ring semeton Idane mekadi I Dewa Bontal. Jawaban Dewa Bontal , yen Ida Bethara ring Pucak Luhur nuwenang , ring wengine mangde Ida Bethara ring wengine ngambil, tiyang ring sekala tan bani mebasang. Malih karya ring Pucak Luhur malih kauningan ring Ida Bethara indiki asapunika.

Pura Subak kopine kagingsiran saking Pura Pucak , manut baos Ida Bethara Pucak kabaos ring Ida Bethara banget kebus nyanding Pura Subak , linggih Dewa Ayu Mas Ngelepe. Mangkin kalinggihang ring dauh margi ring pengkolan marginé ke Pura Daleme mangkin , ngereruakng dasar pelinggih subake tanggal 13 September 1957. Pura Subak punika kawastening Subak Gunung Kutul , Pura Daleme kagingsiran saking linggihe bedauh kalinggihang baleran Merajapati. Ring pecak linggih Pura Pusehe dumun , melaspas Pura Dalem sahe ngelinggihang turmaningmekarya tanggal 8 April 1975. , tur ngelemek tanggal 11 April 1975

Inggih wantah sapunika uning titiang , sampun janten nenten cara mendetail atau terperinci , dening tiyang kari cenik sedaweg tiyang katuturin ring Penglingsir – Penglingsire dumum mekadi saking Kaki Duri , Kaki Kaji , Kaki Nurana taler ring Meme Rai. Durung tiyang uning nyungkedang atau mitegesang. Ampura saking tiyang

Disalin pada tanggal : 4 Januari 2007

Di Desa : Pucaksari

Oleh



I Nengah Latra